



REPUBLIKA E KOSOVËS / REPUBLIKA KOSOVA

GJYKATA THEMELORE MITROVICË - DEGA E GJYKATËS VUSHTRRI

Numri i lëndës: 2023:097261

Datë: 14.03.2025

Numri i dokumentit: 06993680

NË EMËR TË POPULLIT

P.nr.136/2023

GJYKATA THEMELORE NË MITROVICË - DEGA NË VUSHTRRI - Departamenti i përgjithshëm-Divizioni Penal, gjyqtari i vetëm gjykues Naim Rekaliu, me zyrtaren ligjore Arta Jusufi, në çështjen penale kundër të pandehurit F.Z nga Vushtrria, për shkak të veprës penale *Posedimi i paautorizuar i narkotikëve, substancave psikotrope apo analoge* nga neni 269 par. 1 të KPRK-së, i ngarkuar sipas aktakuzës Prokurorisë Themelore në Mitrovicë, PP.II.nr.362/2023, të datës 27.04.2023, pas përfundimit të shqyrtimit fillestar publik të mbajtur me datë 13.03.2025, në të cilin ishin të pranishëm prokurori i shtetit dhe i pandehuri, me datë 14.03.2025, në prani të procesmbajtëses shpalli, dhe në të njëjtën datë përpiloi këtë:

A K T G J Y K I M

I PANDEHURI: F.Z, nga i ati D..., e ëma M..., e vajzërisë M..., i lindur më ..., në ..., Komuna Vushtrri, tani me vendbanim në Vushtrri, rr. "...", me numër personal ..., të kryer shkollën fillore, i pa punësuar, i pa martuar, i gjendjes së dobët ekonomike, shqiptar, shtetas i Republikës së Kosovës.

SHPALLET FAJTOR

Sepse:

Më date 28.10.2022, rreth orës 13:30, në rrugën "..." në Vushtrri i pandehuri pa autorizim posedon substance narkotike ashtu që Policia e Kosovës gjatë një kontrolli në vendin e lartcekur ka ndaluar personin tani të pandehurin F.Z dhe gjatë kontrollit tek i pandehuri, në xhepin e

pantallonave te tij kane gjetur një sasi me substancë narkotike te llojit marihuan dhe një grinder (mulli qe shërben për bluarje te marihuanës), e te cilën substance narkotike te njëjtit i është konfiskuar dhe pas ekzaminimit te kësaj substance ne laborator te Forenzikës është konstatuar se është substance narkotike e llojit kanabis marihuanë që përmban Tetrahidrokanabinol (THC), me peshe neto 0.73 gram,

Me këtë veprim ka kryer veprën penale - *Posedimi i paautorizuar i narkotikëve, substancave psikotrope ose analoge nga neni 269 paragrafi 1 të KPRK –së*, (Kodi Penal i Republikës së Kosovës nr.06/L-074).

Andaj, gjykata konform dispozitave të neneve 38, 39, 40, 42, 43, 69 dhe 70 të KPRK-së, si dhe nenit 241, 242, 269, 276, 364 dhe 450 të KPPK-së,

E G J Y K O N

I. ME DËNIM ME GJOBË në shumën prej 400€ (katërqind euro), i cili dënim duhet të paguhet në afat prej 15 ditësh nga dita e plotfuqishmërisë së këtij aktgjykimi, në rast se i pandehuri refuzon të paguaj dënimin me gjobë, atëherë ky dënim me gjobë do të shndërrohet në dënim me burg, duke i caktuar të pandehurit për çdo njëzet (20) euro të dënimit me gjobë, nga një (1) ditë burgim, si dhe DËNIM ME BURGIM EFEKTIV në kohëzgjatje prej 90 (nëntëdhjetë) ditëve.

II. KONFISKOHET nga i pandehuri F.Z, substanca narkotike e llojit kanabis marihuanë, që përmban Tetrahidrokanabinol (THC), me peshë neto 0.73 gram.

III. DETYROHET i pandehuri që në emër të kompensimit të viktimave të krimit të paguajë shumën prej njëzetë euro (20€), si dhe në emër të paushallit gjyqësor të paguajë shumën prej tridhjetë euro (30€), të gjitha këto në afat prej 15 ditësh prej ditës së marrjes së formës së prerë të këtij aktgjykimi nën kërcënimin e ekzekutimit të dhunshëm.

A r s y e t i m

Pjesa hyrëse e aktgjykimit të arsyetuar

Prokuroria Themelore në Mitrovicë – Departamenti i Përgjithshëm ka ngritur aktakuzë PP.II.nr.362/2023, të datës 27.04.2023 kundër të pandehurit F.Z nga Vushtrria, për shkak të veprës penale Posedim i paautorizuar i narkotikëve, substancave psikotrope ose analoge nga neni 269 par.1 të KPRK-së.

Gjykata ka caktuar dhe mbajtur seancën e shqyrtimit fillestar me datë 13.03.2025, në të cilën seancë ka prezantuar Prokurori i Shtetit Rilinda Kadriu dhe i pandehuri F.Z.

Pas leximit të aktakuzës, nga ana e Prokurorit të Shtetit, dhe pasi që gjykata është bindur se i pandehuri e ka kuptuar aktakuzën dhe veprën penale për të cilën akuzohet, si dhe sqarimit të benefiteve dhe pasojave të pranimit të fajësisë, të njëjtit i është ofruar mundësia që të deklarohet lidhur me fajësinë. I pandehuri ka deklaruar se ndjehet fajtor për veprën penale që i vihet në barrë, po ashtu gjykatës i ka premtuar se në të ardhmen nuk do të përsërisë vepra penale.

Prokurorja e shtetit lidhur me pranimin e fajësisë nga ana e të pandehurit ka deklaruar se pajtohet me pranimin e fajësisë dhe gjykatës i ka propozuar që ta aprovojë këtë pranim fajësie të bërë nga i pandehuri, pasi që ky deklaram është në përputhje me provat që gjenden në shkresat e lëndës, e që janë prova të ligjshme të marra nga prokurori i shtetit. Gjykatës i ka propozuar që me rastin e marrjes së vendimit lidhur me llojin dhe lartësinë e dënimit, të marrë si rrethanë lehtësuese pranimin e fajësisë, pendesën e tij për veprimet që i ka kryer, kërkim faljen e tij të shprehur në gjykatë, ndërsa si rrethanë rënduese ti merret rrezikshmëria shoqërore që rezulton nga këto vepra penale, si dhe nga gjykata ka kërkuar që sipas detyrës zyrtare të pajiset me certifikatë nga e kaluara kriminale për të pandehurin, në mënyrë që të verifikohet se i njëjti a ka vendime të plotfuqishme në raport me veprat e njëjta penale, ashtu që të shikohet nëse ka kushte për plotësimin e rrethanës rënduese të recidivizmit, e nëse nuk rezulton një rrethanë e tillë e njëjta ti merret si rrethanë lehtësuese.

Gjykata duke vlerësuar pranimin e fajësisë nga ana e të pandehurit ka gjetur se, pranimi i fajësisë ishte në pajtim me nenin 242 par. 2 të KPPK-së pasi që, i pandehuri e ka kuptuar natyrën dhe pasojat e pranimit të fajësisë, se pranimi i fajësisë është bërë vullnetarisht nga i pandehuri, se pranimi i fajësisë mbështetet në faktet e çështjes që përmban aktakuza, se aktakuza nuk përmban ndonjë shkelje të qartë ligjore ose gabime faktike.

Faktet e çështjes në raport me provat që përmban aktakuza.

Gjykata ka konstatuar se pranimi i fajësisë është i mbështetur edhe në provat materiale të cilat mbështesin aktakuzën dhe atë: raportin policor, procesverbal mbi marrjen në pyetje të të pandehurit F.Z, vërtetimin për sekuestrimin e sendeve, raporti i ekspertimit i datës 13.02.2023, foto dokumentacioni, informacionet për të kaluarën kriminale e nxjerre nga data baza e policisë, si dhe shkresat tjera të lëndës.

Gjetjet e gjykatës lidhur me llojin dhe lartësinë e dënimit.

Gjykata kur vendosi të shqiptoj dënimin si në dispozitiv të këtij aktgjykimi u bazua në dispozitat 38, 39, 40, 42, 43, 69 dhe 70 të Kodit Penal të Republikës së Kosovës (06/L-074) dhe atë duke vlerësuar rrethanat lehtësues dhe rënduese të çështjes.

Për veprën penale për të cilën është shpallur fajtor i pandehuri ligjvënësi ka paraparë mundësinë e shqiptimit të dënimit me gjobë dhe me burgim prej një (1) deri në tre (3) vjet, e në këtë rast gjykata ndaj të akuzuarit vendosi që të shqiptoj dënim me gjobë në lartësi prej 400 (katërqind) euro i cili dënim do të paguhet nga i akuzuari në afat prej 15 ditësh nga dita e plotfuqishmërisë së këtij aktgjykimi, e nëse i akuzuari nuk dëshiron apo nuk mund të paguaj gjobën, do të zëvendësohet me burgim, ku për çdo 15 euro gjobë do të llogaritet një ditë burgim, po ashtu ndaj të pandehurit ka shqiptuar dënim me burgim efektiv në kohëzgjatje prej 90 (nëntëdhjetë) ditëve.

Duke i analizuar faktet e çështjes, gjykata erdhi në përfundim se në lidhje me të akuzuarin për rrethanat lehtësuese dhe rënduese të përcaktuara, e të përmendura nga ana e Prokurorit të Shtetit, të cilat ndikojnë në llojin dhe lartësinë e dënimit ashtu që si rrethana lehtësuese gjeti se i akuzuari në shqyrtimin fillestar ka bërë pranimin e fajësisë në mënyrë të vullnetshme, po ashtu ka shfaqur pendimin e tij, për veprën e kryer si dhe premtimin e tij se në të ardhmen nuk do të kryej vepra penale, ndërsa si rrethana rënduese gjykata ka gjetur shkallën e përgjegjësisë penale, rrezikshmërinë shoqërore që paraqet kjo vepër penale, faktin se këto vepra penale janë në rritje e sipër në territorin ku është kryer kjo vepër dhe faktin se i njëjti ka qenë edhe më parë i dënuar për vepra penale të kësaj natyre dhe të natyrave të tjera e cila është vërtetuar nga evidencat penale dhe atë me aktgjykimin PKR-137/2014 në Gjykatën Themelore në Prishtinë i cili është bërë i plotfuqishëm me datën 02.06.2015 për veprën penale Grabitja, aktgjykimin P.nr.254/2020 në Gjykatën Themelore në Mitrovicë Dega në Vushtrri i cili është bërë i plotfuqishëm me datë 22.05.2023 për veprën penale Vjedhja e rëndë dhe aktgjykimin P.nr.32/23 në Gjykatën

Themelore në Mitrovicë Dega në Vushtrri i cili është bërë i plotfuqishëm me datë 26.12.2023 për veprën penale Posedimi i paautorizuar i narkotikëve, substancave psikotrope ose analog, aktgjykimi P.nr.225/2024, i plotfuqishëm nga data 09.12.2024, për veprën penale posedim i paautorizuar i narkotikëve, dhe duke u nisur nga këto rrethana dhe në kuptim të nenit 38 të KPRK-së, gjykata vendosi që ndaj të akuzuarit të shqiptoj dënimin si në dispozitiv të këtij aktgjykimi.

Ashtu që gjykata, pasi i ka vlerësuar rrethanat lehtësuese, gjeti se janë plotësuar kushtet nga neni 71 par. 1 nën par. 1.3, të KPRK-së, për të zbutur dënimin me burgim, dhe me këtë rast gjykata duke zbatuar nenin 72 par. 1 nën par. 1.5 të KPPK-së, ku përcaktohet se *“nëse për veprën penale është paraparë si masë më e ulët dënimi me burgim prej një (1) viti, dënimi mund të zbutet deri në tre (3) muaj burgim”*, andaj gjykata pasi që gjeti rrethanat lehtësuese të përshkruara si më lartë, zbuti dënimin e të pandehurit për veprën penale Posedimi i paautorizuar i narkotikëve, substancave psikotrope apo analoge nga neni 269 par. 1 të KPRK-së, në të cilin është paraparë shqiptimi i dënimit me burgim prej 1 deri në 3 vite, e që dënimin me burgim e zbuti nën dënimin minimal prej 1 (një) viti, duke i shqiptuar të pandehurit dënim me burgim në kohëzgjatje prej 90 ditëve.

Gjykata erdhi në përfundim se lartësia e dënimit me gjobë prej 400 (katërqind euro), i cili dënim do të ekzekutohet në afat prej 15 ditësh pas plotfuqishmërisë së këtij aktgjykimi, si dhe dënim me burgim efektiv në kohëzgjatje prej 90 (nëntëdhjetë) ditëve, janë dënime në përputhje me peshën e veprës penale, shkallën e përgjegjësisë penale të tij, gjykata gjithashtu është e bindur se vendimi mbi dënim do të shërbej për arritjen e qëllimit të dënimit në parandalimin e të akuzuarit nga kryerja e veprave penale në të ardhmen dhe të bëj rehabilitimin e tij, por ai duhet të ndikoj edhe si preventivë e përgjithshme për personat tjerë që t'i parandaloj nga kryerja e këtyre veprave penale dhe të shpreh gjykim shoqëror për veprën penale, ngritjen e moralit dhe forcimin e detyrimit për respektimin e ligjit, të gjitha këto të parapara me nenin 38 të KPRK-së.

Gjykata erdhi në përfundim se lartësia e dënimit me gjobë prej 400 (katërqind euro), i cili dënim do të ekzekutohet në afat prej 15 ditësh pas plotfuqishmërisë së këtij aktgjykimi, si dhe dënim me burgim efektiv në kohëzgjatje prej 3 (tre) muajve, janë dënime në përputhje me peshën e veprës penale, shkallën e përgjegjësisë penale të tij, gjykata gjithashtu është e bindur se vendimi mbi dënim do të shërbej për arritjen e qëllimit të dënimit në parandalimin e të akuzuarit nga kryerja e veprave penale në të ardhmen dhe të bëj rehabilitimin e tij, por ai duhet të ndikoj edhe

si preventivë e përgjithshme për personat tjerë që t'i parandaloj nga kryerja e këtyre veprave penale dhe të shpreh gjykim shoqëror për veprën penale, ngritjen e moralit dhe forcimin e detyrimit për respektimin e ligjit, të gjitha këto të parapara me nenin 38 të KPRK-së,

Vendimin lidhur me konfiskimin e substancës narkotike, gjykata e ka marr në bazë të nenit 269 par.1 e në lidhje me nenin 276 KPK-së.

Vendimi mbi shpenzimet e procedurës penale gjykata e ka marrë në bazë të nenit 449 par 2 nën par 2.6 dhe nenit 450 par. 1 të KPPK-së.

Vendimin për taksën e kompensimit të viktimave të krimit gjykata e ka marrë në bazë të nenit 6 paragrafi 1 pika 1.5 dhe nenin 39 par 3 pika 3.1 të Ligjit Nr. 05/L-36 për Kompensimin e Viktimave të Krimit.

Andaj, gjykata duke u bazuar në arsyet e lartshënuara ka vendosur si në dispozitiv të këtij aktgjykimi.

GJYKATA THEMELORE NË MITROVICË – DEGA NË VUSHTRRI

Departamenti i Përgjithshëm – Divizioni Penal

P.nr.136/2023, datë 14.03.2025

Zyrtarja Ligjore

Arta Jusufi

Gj y q t a r i

Naim Rekalio

KËSHILLË JURIDIKE: Kundër këtij aktgjykimi palët kanë të drejtë ankese në Gjykatën e Apelit në Kosovë, në afat prej tridhjetë (30) ditësh, llogaritur nga dita e pranimit të aktgjykimit. Ankesa dorëzohet përmes kësaj Gjykate, në kopje të mjaftueshme për palët dhe për gjykatën.